

san tan ni filanar nimòrò 134
 awirili kalo san 1983
bp:24 - bamakò (mali)
 télèfòn: 22-21-04 CCP : 0155
 dòrèmè 5

kibarudilaw kuntigi: amadu ganyi kantè

kibaru

a bë bò kalo o kalo, faso ka kibarudiso ka yamaruya kònò

mèlèkèninw lakanani

denbatigi bée haminako ye, a den ka kè mögò kénè ye, a ka barika sòrò, k'a módiya.

nka, bée b'a dòn fana ko bana ka teli ka denmisènw minè, fo ka kè u sata ye.

fèerè minnu bë se ka kè ka denmisènw kisi o masibaw ma, o dòw fòlen filè, kibaru in nyè 6 ni nyè 7 la.

o fèerè ninnu ye denmisèn caman kisi ka ban dinyè na. n'i y'a kalan, k'a waleya, o bë se ka kè i ka mèlèkènin fana kisi sababu ye.



nb'a fè ka nyèrè dòn

kabini tuma jan, kibaru kalanbaga caman bë lètèrè ci kibaru ma, ka kunna-foni nyini Mali jamana kan. o lètèrè dòw filè nin ye :

nin ye nyininkali ye : n b'a fè k'a dòn, Mali kònò ereziyòn min ka bon ka tèmè tòw kan, ani arondisiman min bë a kònò, ani Mali dugu haké.

Ngolo Tarawele
Mamaribugu

*

ne bë nin lètèrè ci kibaru kunna-foni dibagaw ma, ka u nyininkali kunna-foni naani la :

- sèrikili joli bë Mali kònò ?
- arondisiman joli bë Mali kònò ?
- dugu joli bë Mali kònò ?
- mögò joli bë Mali kònò ?

balikukalanden caman bë Mali kònò, minnu té nín dòn. nyininkali naani ninnu nafa ka bon kosèbè. bawo, mögò bée ka kan k'i ka jamana dòn.

Usumani Kulubali
Kuwo

*

**

n bë min nyini aw fè, o ye ka n yèrè dòn. barisa, an maninkaw ko : «so dòn, ji dòn, fali dòn, mögò dòn ; yèrè dòn nyògòn té.» n b'a fè ka n yèrè dòn.

o yèrè dòn bë sòrò cogo di ? an ka

aw nyininkali, o nyininkali faña kana aw sègèn. n ka nyininkali bë min kan, n b'a fè ka Mali dòn :

- Mali sigi san joli ye nyinan ye ?
- Mali masakè fòlò ye jòn ye ?
- masakè joli ye Mali mara ?
- siya joli bë Mali kònò ?
- u bë kan joli fò ?
- mögò joli bë Mali kònò ?
- kalanna ye joli ye a la ?
- joli bë balikukalan kè a la ?
- joli ye cikèla ye a la ?
- muso joli bë Mali kònò ?
- Mali cè ye joli ye ?
- san jumèn bë denmisèn si ni mögòkò-ròba si danfara ?

Laji Danbèlè
Bukaribaya
(a jaabi bë nyè 12 la)

faso jèkuluba ka tònsigi

Mali ka forobatònba sariya ko faso jèkuluba de ye pariti nyémògò yòròba ye kòngèrè fila ni nyògòn cè. a ko faso jèkuluba n b è se ka tònsigi balalen kè.

o de kèra zanwuye kalo tile 11, 12 ani 13 la, san 1983. o lajèba in tun nyèsinnen b è sòrò siraw de kan Mali kònò.

Pariti nyémògò peresidan Musa Tarawele ye jèmukan min lase jama ma tònsigi dayèlè dòn, jèkuluba mògòw b ènna a kan k'a fò ko u b èna sinsin o jèmukan de kan u ka baara sen fè.

*
**

peresidan Musa Tarawele y'a jira o jèmukan sen fè ko Mali foroba ciyakèdaw baarakèlaw b è ka caya ka taa a fè. o ye fèn ye, min b è Mali ka musakaw caya ka dama tèmè, k'a sòrò, nafa t'a la.

a ko fèerè ka kan ka tigè, mògò dòw ka don kènyèrèyew ka baaradaw la. a kèra cogo o cogo, Maliden b è ka kan k'a dòn ko, an b è bi bi min na, mògò minnu b è lakòlikalan kè, o b èe tèna se ka kè foroba baarakèla ye.

faso jèkuluba mògòw b ènna a kan



k'a fò ko ni foroba baarakèla min b'a nyini ka taa baàrada wèrè la, o tigi ka kan ka yamaruya.

min ye sòrò siraw, ye, faso jèkuluba in ko a dalen don a la cogo min, k'a fò ko an ka sòrò yiriwali dulonnen don an balima kungo kònò mògòw la, a tè b èn,

fo duguw tòn sigili ka waleya fan b è. zenerali Musa Tarawele yèrè ko sènèkè ciyakèda minnu b è jamana yòrò caman na, olu ka kan ka yèlèma don u ka baarakè cogow la, walasá dugu tòn ninnu ka sigi duguw kònò, ka kè nyètaa sababu ye cikèlaw-bolo.


jèkuluba in, ko a b'a nyini góférènaman ni pariti fè, fèerèw ka waleya, minnu nyèsinnen don ji ko la, i n'a fò, kòlòn senni, balan labènni, an'a nyògònnaw.

u ko u b'a nyini fana, denmisènw ka baaraòw dege lakòlikalan sen fè, ani an faso kanw ka don lakòliw la.

u da sera ko wèrè caman ma, minnu b è b è se ka k è ko nafamaw ye Mali ka bònògòla baara la.

*
**

peresidan Musa Tarawele ye tònsigi in kùncè k'a fò ko kuma minnu fòra, olu kèra kuma nafama ye, ko b èe k'i jija sa ka o kuma ninnu waleya, ko o de b è kè Mali nyètaa sababu ye.



kibaru kanubagaw kuma yòrò

ka bò Bugukòrò

ne bè kelen nyini arajomali baarakèlaw fè, u k'u ji ja o la :

an ka jamana balontannaw mana taa jamana wèrè la, walima jamana dò wèrè balontannaw mana na an fè yan, arajomali baarakèlaw bè "siporitèriw" nyininka arajo la. ðòw b'a fò : "an bè nin bi hakè dòn u la bi."

o ye fèn ye, min bè ne maloya kosèbè. a ma fò ko mógo kana i foso lakana dè. nka, i ka kan k'a jate minè, k'a fò ko : "n'an ma u bugò, an t'a fè u k'an bugò." balòn mana tan, n'an y'u bugò, o fò ka di. n'u y'an bugò o fana fò ka di.

nka, i man'a fò ko "an bè nin bi hakè in dòn", n'i y'o fò sògòmada fè, sanni ka balòn tan, fo ne ja bè tigè, k'a d'a kan, n t'a dòn n'an bëna se. o ye fèn ye, fèn min bè a la, n'a ka kan ka dabila.

ne m'a fò ko jamana kana pasa. nka, ko min bè jamana lamaloya, ne ko o'ka dabila. bawo, da fò man nyi. Mari Kanè

nyininkaliw

basanin bolitò binna kòlòn na. a kò a bè bò, a ye mètèrè kelen taama, a binna a nò na. a wulila tûgun, ko a bè bò, a ye mètèrè kelen ni tila taama, a binna kòlòn na tûgun. a ko a bè bò, a ye mètèrè fila taama, a binna a nò na tugun. a ko a bè bò tugun, a ye mètèrè fila ni tila taama, a binna a nò na tugun. a ko a bè bò tugun, a ye mètèrè saba taama, a bòra.

yala, kòlòn dunya ye mètèrè joli ye ?

◦◦◦

fatòkè nana i sigi npòn kòn, ko

kòori san jèkulu

Jaramana ni Bila cè, n'o yè an ka kubeda yòrò ye, o ye kilomètèrè 46 ye. Jaramana arondisiman yèrè ye dugù 23 ye ; balikukalan bè dugu minnu na, o ye dugu 12 ye.

o de y'a to, kòori san jèkulu min b'an fè yan, n'o bè wele ko "gurupeman", o sigira dugu dama dò la Jaramana arondisiman kònò.

mògo si tè npòn tigè, ni min ko a bè npòn tigè, a bè i lasegin.

nka, a sigilen bè tuma dòw k'a kun biri; tuma dòw, a sigilen bè k'a kun lawuli.

ni mògo min ko i bè npòn tigè, i ka kan ka fèerè jumèn tigè, walasa i ka se ka npòn tigè ?

Sirimor Das Jara
Koyan

◦◦◦

ne bè mógo fila nyè fè, mógo fila bè ne kò fè. an ye mógo joli ye ?

Bakari Samaké
Dikan

nafa min bè gurupeman na, o nafa tè se ka fò ka ban. barisa, kabini gurupeman sigira an ka dugù la, a ye foroba musakaw bée ta. baliku-kalandenw ka petòròli ani u ka minèn misènw ka wariw, o bée bè bò gurupeman kèsu kònò.

Burama Sogoba
Jaramana

farafinna nsonba

farafinna nsonba...
n'i t'o dòn,
na, n'k'o jir'i la.

a taatò filè
a ka watirilikisi kònò,
a ka alijènèsoba kònò.
a lajè kosèbè,
a fununnen bè,
a tòlòlen bè.

i m'a ka miliyari tannan ko mèn wa ?
a ka jiriforow dun ?
o si n'a ka

sanu
jaman
maralen tè kelen ye.

he, n'teri,
a fò, nin bée ye maa kelen wòsi ye ?
nin bée halala ?

a taatò filè,
a bè k'i nòn hèrèmugu cè ma,
a y'an ka dènkundi

furuw
holokoliw
k'an bolo lajaba ye.

an b'o t'o ma ?
Yòrò Mènkòrò Jakite
Buguni

il nage ds
l'alo arre

d'a rendu
eff. pour
n'ello

On peut faire des ga
comme ça ?

miliyòn jate ko

ka bò Kinyègè

an y'a ye liburunin dò kònò ko miliyòn 1 ni baa kémè 9. an dun b'a dòn ko jate min ka ca, o de fòlò bë fò, ka fitinin da o kan. n'i ye liburunin kònò jate in lajè, i b'a fò ko miliyòn 1 de ka ca, o de y'a to o bilalen bë baa kémè 9 nyé fè.

o yòrò la, miliyòn 1 de ka ca, walima baa kémè 9 de ka ca ? n'a y'a sòrò k'a fò ko baa kémè 2 de ye miliyòn 1 ye, mun kosòn, a bë fò liburu nin kònò ko miliyòn 1 ni baa kémè 9 ? n'an y'a lajè an ka bamanan jate la, miliyòn sigiyòròma 4 ni baa kémè de bë baa kémè 9 la. an se min kéra miliyòn na, jate kòfèla cayara ni nyefèla ye.

nin fana ye misali ye, ni n yérè ye min jate minè liburunin kumakan kosòn ; nka, n ma nyé ye a la :
nògò bòrè kémè duuru, nògò bòrè kelen kelen ye baa saba ye. nògò bòrè 500 ka kan ka bèn joli ma ?

o bë bèn : $3000 \times 500 = 1500000$. o ye liburu ka jate ye.

nka, an ka bamanan jate la, a ka kan ka bèn miliyòn 7 ni baa kémè 1 ma. bawo, a man kan k'a fò ko miliyòn 1 ni baa kémè 5, k'a sòrò, miliyòn 1 ye baa kémè 2 ye.

an ka nyogònkunbèn kalan dò kéra Kangaba, an ma bèn jate nin fò cogo kelen ma. dòw ko : 3000×500 , ko o ye baa kémè 15 ye ; dòw ko : miliyòn 7 ni baa kémè 1 ; dòw ko : miliyòn 1 ni baa kémè 5.

n balimaw balikukan nyémögòw, n b'a nyini aw fè, aw ka ne ni n balimaw ladònniya miliyòn jate la : miliyòn 1 ka kan ka bèn baa kémè joli ma ? Dégémori Dunbiya

jaabi

an terikè Dégémori Dunbiya ka kuma bë laban ni nyinkali min ye, o de ye a ka kuma tò bée ju ye. o jaabi filè :

miliyòn ye tubabukan donneñ ye bamanankan na. a tubabukanman wo, a bamanankannaman wo, a bée kòrò ye kelen ye : miliyòn ye baa kelen sigiyòròma baa kelen ye. baa kelen dun ye kémè 10 ye. o la, miliyòn 1 ka kan ka bèn baa kémè 10 de ma.

fèn o fèn bë se ka jate, o bée jate bë se ka se miliyòn ma : n'i y'a mèn ko misi miliyòn kelen, o ye misi baa kelen sigiyòròma baa kelen ye, walima misi baa kémè sigiyòròma 10. n'i y'a mèn ko dòròmè miliyòn kelen, fili man kan ka don a la ; o ye dòròmè baa kelen sigiyòròma baa kelen ye, walima dòròmè baa kémè sigiyòròma 10. n'i y'a mèn ko tama miliyòn kelen, o ye tama baa kelen sigiyòròma baa kelen ye.

*

**

miliyòn kòrò tè se ka kë fila ye kelen kò. mun dun y'a to, a bë mògò dòw kònò ko miliyòn ye baa kémè 2 ye ?

an b'a dòn ko tama de bë kë ka Mali wari jate tubabukan na. a dun mana fò ko Mali wari miliyòn 1, tubabukanfòlaw hakili bë taa bila tama jate de la, ko tama miliyòn kelen. tama miliyòn 1 dun bë bèn dòròmè baa kémè 2 de ma. nka, u t'a faranfasiya k'a fò ko tama jate de b'u kònò. u b'a fò dòròmè baa kémè 2 ye.

o de bë nyagami don miliyòn ko la. n'o tè, a ma fòko miliyòn 1 ye baa kémè 2 ye. a fòra ko tama miliyòn 1 ye dòròmè baa kémè 2 ye, tama 5 ye dòròmè 1 ye cogo min na. tama 5 ye dòròmè 1 ye, nka a ma fò ko 5 ni 1 ye kelen ye. o cogo kelen na, tama miliyòn 1 ye dòròmè baa kémè 2 ye, nka a man kan ka fò ko miliyòn 1 ni baa kémè 2 ye kelen ye.

*

**

o la sa, an k'an hakili to nin na :

- ni wari bë jate, n'i y'a mèn ko miliyòn, fo i k'a dòn fòlò n'o tigi bë dòròmè miliyòn de kofò, walima tama miliyòn. i fana mana miliyòn kofò, i k'a faranfasi konyuman, k'a fò k'a jéya, n'i bë tama de jate fò, walima n'i bë dòròmè jate fò. i b'i hakili to a la ko tama jate ka ca ni dòròmè jate ye sinyè duuru.

- n'i bë jateminè kë, i kana dòròmè jate ni tama jate kolonso abada. ni jateminè daminèna ni dòròmèw ye, dòròmè jate de ka kan ka ye a la, fo k'a foori: n'a ma kë o cogo la, fili bë don i ka jateminè na.

*

**

n'an sera ka miliyòn ko in faamuya, gélèya minnu jiralen filè Dégémori ka lètèrè kònò, o gélèya tèn'an sòrò :

- an bë se ka baa kémè kë 2 ye, walima 3, walima 9, k'u sèbèn ten. bawo, o si man ca ni miliyòn 1 ye.

- ni jateminè kéra, min mana sòrò, o sèbènnen bë cogo min, a bë kalan ten.

i n'a fò : 3000×500 ; ni jateminè kéra a kë cogo la, i tè se ka foyi wèrè sòrò ni 1500000 tè. o dun sèbènnen cogo min, i b'a kalan ten, k'a fò : miliyòn kelen ani baa kémè duuru.

kilo 35650000

miliyòn	baa	ani
bì : ni	kémè : bi : ni	kémè : bi : ni
3 : 5	6 : 5 : 0	0 : 0 : 0

miliyòn bì 3 ni 5 ani baa kémè 6 ni bì 5

Daa ni Bakari jan

jeli Baba Sisòkò ka maana

u sera bulon filanan kònò,
tònjònw ni bere ko u bë fo ka wuli,
Daa pérènna u kun na :
- "fa bëna don aw rò wa ?
a' ye tèmè k'aw da,
fòlen ma bò."

U nana se bulon sabañan kònò,
o jama fana ko u bë girin ka wuli.
Daa ko :
- "a' ye tèmè k'aw da,
Segu fòlen bëe tè bò."

o de kéra ntalen ye an bolo :
halí sini sògòma,
mògòw b'a fò ko
"Segu fòlen bëe tè bò dè."

◦ ◦

ò, mògòtigi nana Bakari Jan bila
fo a ka bulonda la.

Bakari ko a den Sinbalan ma :

- "è, n den,
faama n'a ka baramuso bila yan sa."
ò, Sinbalan sòròla k'a fò faama ma :
- "i n'i muso ka sigi yan."

ò, Daa n'a muso y'a kòdi yòrò min,
Sinbalan ye dafila dà don kogo rò,
a ye fan fila bëe konkankon kasí.
nègèw donna kogo jalàn rò yòrò min,
Daa y'a muso nyòni, k'o bin dugu ma,
ka boli ka tèmè.
Daa bolitò nana i bin a ka kalaka kan,
a ka baramuso Kòrinba kuurulen wulila ka fini to a bolo.
o fana bolitò nana i bin so kònò.
Daa ko :

- "èe, Bakari ka nin den nin tè mògò ye.
dònín, marifa nègèden tun bë ne tylo tigè."

a ko : "nka, min kéra,
fo ka taa a fò,
ne Daa ko fanga banna,
kelen, ne yèrè sara,
ne tè Bakari wele tugun
ko n b'a janfa k'a faga."

ò, k'a ta o don na,
ka na a bila bi la,
Bakari Jan,
a janfakokuma ma fò Segu,
a ni Segu faama ma kèlè tugun.

◦ ◦

ò, a den Sinbalan sa, dugu jèrà,
Sinbalan nana i jò :
- "babà, i ni sògòma".
a ko : - "marahabanin,
n den Sinbalan, hèrè sira ?"
a ko : - "babà, e tun tè a fò ten fòlò.
nka, e tun b'a fò ne ma
ko musokolonden de.
ò, babà, ne kòni ye musokolonden ye,
ò, nka, su rò ni ne tun tè dè,
faama tun b'i kun ci k'i faga dè."
- "aa", a ko : "n den, o ye tinyè ye,"
a ko : "nka,
n tè musokolondenya fò i ye tugun."

◦ ◦

ò, Sinbalan ma muso furu,
Sinbalan sara,
a san bisaba ni saba.

ò, Bakari Jan fana ye a ka mògòya kè Segu o rò sa,
ka na faga,
faama m'a wele tugun ko a b'a janfa.

◦ ◦

jeliw ko Bakari ma o de rò sa, ko :
Kòda ni Jènèba den,
ko : Bòngèla Hamari mòden,
Sini-ka-jan den,
Maankòrò Kònè den,
Kèlèkè Kònè den,
ko tògò jan ani cè jan tè kelen ye,
nka, mògò carman ka jan,
nka, tògò t'i la.

janto-yèrè-la kòrò ko ka nyi mèlèkèninw lakanani

fèerèw sòròla denmisèn w lakanali la

dònnikèlaw ka jate la, denmisèn 40 000 de bè sa don o don dinyè kònò, k'o sababu bò balo ko juguya ni banaw la. o ko ninnu bè gèlèya yòrò minnu na, olu ye jamana hòrònyalen kuraw ye, Afiriki kònò, Asi kònò, ani woredugyanfan Ameriki la. o yòròw denmisèn w ka nyani sirilen don u bangebagaw ka kòli n'u ka faantanya la.

◦ ◦

o wale in juguya de y'a to, dinyè jamana hòrònyalen w ka tònba min ka baara nyèsinnen bè denmisèn w lakanani n'u ladomni ma, o ye fèerè dòw nyini mèlèkèninw kisili sira kan. o nyinini sen fè, a yera k'a fò ko fèerè dòw

bè yen, minnu bè se ka kè sababu ye ka denmisèn caman kisi saya ma san o san, k'a sòrò, wariba ma bò o denmisèn ninnu bangebagaw fè.

u ye min jira nyinan, k'a lase dinyè kònò bangebagaw bée ma, o ye fèerè duuru ye. tònba in kuntigi y'a jira k'a fò ko fèerè duuru ninnu bëna se ka denmisèn 20 000 ni lakan don o don.

an hakili la, fèerè ninnu nafa ka bon cogo min na an denw ka dinyèlatigè la, bangebagaw bëna u cèsiri u waleyali la, walasa mèlèkèninw ka kisi balo ko juguya ni bana juguw masibaw ma.

o fèerè duuru ninnu filè nin ye :

fèerè fòlò : kònòboli fura

kònòboli mana denmisèn minè ka juguya, a ka ca a la, o bè kè bojiba ye, fo ka jiba sama ka bò a farikolo la. ji dun mana dògòya mògò farikolo la, o ka telì ka kè i sara ye, o de y'a to kònòboli ye bana jugu ye : an filè yòrò min, san o san kònòboli de bè kè den 5000 000 sata ye dinyè kònò.

fèerè fòlò in tè dò wèrè ye, ka dan sigi den farikolo ji banni la kònòboli fè :

fòlò, kònòboli n'a nyögòmma banaw tun mana den minè, a tun tè se karfurakè, fo dògòtòròso. fèerè kura min sòròla o la, ni denbatigè bée bè se k'o waleyaya u ka so, o ye ji ni kògò ni sukaro nyagamili ye, k'a d'i den banabagatò ma. an dan ye ka ji litiri kelen wuli ; n'o sumana, an bè kudu fitinin sukaro nyè 8 kè a la, walima sukaro kisè 8, ani kògò kudu fitinin nyè kelen. an mana o nyagami konyuman, k'a d'i den ma, a ka dò min à la waati ni waari, a ka ca a la, kònòboli bè kènèya tilé saba kònò, ji tè sama ka bò den farikolo la. an k'an jan'o a la fana ko den kònòbolibagatò ka kan ka dumuni kè ka la, walasa a ka barika sòrò ka bana in kèlè.

dònnikèlaw y'a jira ko o fèerè fòlò in bè se ka denmisèn 15000 nyögòm kisi don o don dinyè kònò.



fèerè filanan : boloci

fèerè filanan ye boloci ye bana dòw kama i n'a fò, nyòninsan, ja-gòyi, keteketenin, sògòsògòninjè, ani sensabana.

o banaw bè kè mèlèkènin 5000000 sata ye san o san dinyè kònò.

boloci ko in delila ka sèbèn liburu dò kònò, min dilanna ènpirimeri Kasé Keyita fè, n'o tògò ko "bolociw".



fèerè sabanan : sinji

fèerè sabanan ka nògò : a nyininén dòn denbatigw fè, u kana nòndò fosi bila u sinji nyè, sinji nafa dè ka bon den ma ni nòndò tòw ye.



ba ni den
ka kènè
kosèbè.

ba bè sin di den ma.

a jateminèna ko ni denbatigw y'o laadilikan lamèn, denyèrènin 1000000 bèsé ka kisi dinyè kònò san o san.

fèerè naaninan : kòlòsili

fèerè naaninan ye den ka walawalanni jateminèli ye. ni den ka kènè, a bè bonya ka taa à fè. nka, balo ko juyaya ni bana caman bè yen, olu bè dò bò den girinya la.

o la sa, i bè jateminè kè denmisèn la mò cogo la kalo o kalo, n'a y'a sòrò, fèn ma fara den girinya kan, walima ka dò bò a la, i b'a dòn ko ni bana ma den minè, a balo cogo de ma nyè.



fèerè duurunan : wolow janyali

fèerè duurunan ye wolow janyali ye nyògòna. bawo, an bée b'a dòn ko sere man nyì den ni ba si ma.




Turamagan Tarawele

a fòra kibaru nimòrò 133 kònò ko Turamagan Tarawele n'a ka kèledenw wulila ka taa Jolofin masakè kama. u sera Jolofin jamana na, Turamagan yèrè taara Jolofin masakè nyininka, ko : - "Jata ka ciden min nana i fè yan, i ye mun de manamana kuma f'a ye, ko a ka taa o fò Jata ye Manden ?" Jolofin masakè ko : - "ne Jolofin masa ko n mago tè Mandenka la, ne tè Mandenkaw dòn dò wèrè ye wulu sogo dunna kò."

Turamagan b'a la ka Jolofin masa nyininka



nin ye Jolofin masa ye



nin ye Turamagan Tarawele ye

Jolofin masakè ye o kuma fò ka bò a da rò tuma min na, Turamagan Tarawele y'a sògò ni kala binyè ye. o binyè in minnen don : ni joli bòra i la, i bè sa yòrònín kelen, nègè haya t'a kùnbèn fana.

o kelen, Jolofin masa ko :

- "ee, n sara sà."

a kelekura ka bin. dò wèrè ma ye o la saya kò. Turamagan y'a bonbonsi tigè ka bò a la, k'o bila a kun, ka sòrò, ka taa a nyè fò a ka kèledenw ye so kò fè. o kelen, olu ko :

- "mun na, i m'an wele ?"

Turamagan ko :

- "min y'a to ne m'aw wele Jolofin masa kama, a ma ne yèrè ka kèle bò. bari, ne y'a nyininka kòròfò min na, a seginna o kan. ne ye n bolo da a la ka ban, a binna dugu ma. ne y'a bonbonsi tigè, k'a bila n kun. a filè nin ye. aw tòw ka don Jolofin dugu kònò, min ka di a' ye, a' ka o kè. Jolofin masa kèra an ta ye, a ka jamana fana kèra an ta ye. sini, an k'an labèn ka taa Manden kònò, an ka taa Manden cèw an'a musow nisòn-diya ni Turamagan Tarawele ka wale nyuman kelen ye, n'o ye Jolofin masakè mineli ye, k'a bonbonsi tigè ka bò a dabara la Jolofin cèw n'a musow cè la."

awirili kalo san 1983

kibaru

nyè 9

ka maana

jeli minnu ye Jolofin masakè ka kuma kolon yèlèma k'a kè dònkili ye, ka nyèsin Mandenkaw ma, Turamagan de y'olu minè k'u fara Manden jeliw kan. u tun ye dònkili min fò, o filè nin ye. u ko :

~~subasubani~~ masaya, joni b'a ta ?
wu'u dumuna subani masaya.

u tun bè nin de fò, janko Jata k'a mèn. nka, sanni Jata k'a mèn, Turamagan y'a mèn. o de y'a to, Turamagan ye kèle nyini Jata fè ka taa Jolofin masakè minè Jolofin, k'a bonbonsi tigè, k'o bila a kun, ka na o di Jata ma Manden.

◦◦◦

dugu jèra sa, Turamagan Tarawele n'a ka kèleçèw ye Manden sira minè. u bè taa Manden, u surunya'en Manden na, farigan ye Turamagan minè sira fè. a ko a ka kèledenw ma :

- "e, Jolofin masa nyama bëna bò ne na. nka, o tè baasi

ye bilen. ni ne yèrè y'ale faga ka ban, ne dusu sumana sa. hali ni n sara sa, n su nyuman na se lahara."

a ka jelikè ko :

- "sanni mògò min ka si jan sòrò, i ka tògò jan sòrò." o y'a lajamu kosèbè, k'a barama. a ko :

"Turamagan ani Kange Jan,

a ko : Muke Musa ani Muke Dantuma,
ninnu bée fa ye Muke Tarawele de ye.

a ko : ba mana fa,

an ko : "ba kò masa" ;

ba mana ja,

an ko : "Turamagan tigè dankan."

a ko : kala ani muru ani tama
ka dì Turamagan ma,

ko : Sarejòn Turamagan si."

◦◦◦

Turamaganw n'u ka jeliw nana don Manden, Turamagan sinna Jata ka so la, k'a dantigè Jata ye.


a ko :

- "Sunjata, ne taara Jolofin masa minè a ka jamana kan. n ye a bonbonsi tigè, k'a bila n kun, ka na. o filè nin ye."

Jata ko :

- "e, Turamagan, i yé koba kè dè. ne siranna min nyè, e y'o kè, ni ne tun ma sira dì e ma, e tun bë sa. i ye nin fana min kè, o bë laban ka kè i sababu ye. nka, o tè fèn tinyè. sanni mògò min ka si jan sòrò, i ka tògò jan sòrò. i ni ce, i ni baraji. fo ka taa dinyè ban pewu, i tògò tè tunun."

Jolofin masakè bonbonsi tigèli, o nyama de wulila Turamagan Tarawele fè, a natò Manden. nka, Turamagan yèrè y'a dòn ko ale tè bò a la. Jata fana y'a dòn ko Turamagan tè bò c la.



Turamagan Tarawele

u tilalen dantigèli la tuma min na sa, Jata ko :

- "an ka taa ne ka so kònò fòlò."

Turamagan ni Jata taara Jata ka so. Jata ko :

- "Turamagan, n bëna dubabu kë i ye." a ko : "i ye baara min kë ne ye, ala ka i sara. e de y'a to, ne ta këra Jolofin jamana ye."

Jata ye Turamagan fo kosèbè. o këlen u farala nyögòn na, bëe taara i ka so.

◦ ◦

Jata y'i sigi, k'i miiri. a ye mògò dò ci Turamagan ma. Turamagan nana Jata ka wele lajè. Jata ye yòrò dò jira Turamagan na ba da la. o tun ye u ka sònnikè yòròba dò ye, o konyè tun bëe Turamagan bolo.. Jata ko a ka yèlèma yen sanni saya ka bara a la.

Turamagan nana ba da la. ala sera a ma ba dà la yen, k'a si to san 117 na. a tununna ntiginyè soden kònò Manden bajiba in da la, mògò m'a sutura. o ni sisani cè ye san 725 ye.

◦ ◦

Turamagan Tarawele tununnen, Jata Keyita taara ba dà la. a ye Turamagan ka basiw nyininka. olu ko :

- "Turamagan donna ntiginyè so in kònò. a ko ale ka hadamadenya banna sa ; a ko a ka foli bëe Jata ye, a ka yafa a ma."

o fòlen Sunjata ye, a kasira. Jata ko :

- "e, ne ka cè farin taara alikiyama. Manden donda tun ye fila ye ; kelen datugulan tun ye Turamagan ye."

Mandenkaw bëe jèra ka dubabu don Turamagan ye. a sònna Sunjata ye cogo min na, ani a sònna a faso ye cogo min na, ani a sònna a faso jamana ye cogo min na, mògò si ma tigè Turamagan na. a taara lahara ka dan-naya ani lademuanya ani hakilisigilenya to a kan Manden jamana mògò bëe fè.

Jolofin masakè tun tè mògò gansan ye. nka Turamagan y'a faga. Turamagan ye tògò duman sòrò Manden, Turamagan Tarawele ye tògò duman sòrò dinyè kònò.



Turamagan donna ntiginyè so kònò, mògò m'a sutura.

◦ ◦

Tamanjan ka kuma lankolon

Turamagan file bannen sa, Jolofin masakè denkè fòlò; n'o ye Tamanjan ye, o ye nkalon tigè, ko ale de ye Turamagan sunđgòbagatò faga. dòw dara a la, dòw ma dà a la, wa Tamanjan ye nin'kuma lankolon min fò, o bëe nkalon..

Turamagan këlen ka Jolofin masakè faga, k'a bonbonsi tigè, k'o bila a kun, ka sòrò, ka taa a ka kèledeñw yòrò so kò fè, Tamanjan de y'a bon ni kòròte binyè ye sògòma fè; nka, o ma si tigè Turamagan na. a y'a bon wula fè; o fana ma si tigè Turamagan na. o këlen sa, Turamagan yèrè y'a ka kòròte binyèmaw bò a ka foroko kònò, k'u bila dugu ma. kòròte in tògò "ntama su". Turamagan ye

kòròte in sòn, k'a ban pewu, ka sòrò, ka Tamanjan fan nyini. a ye Tamanjan bon ni binyè kisènin kelen de ye, o sinna Tamanjan ma, k'a sògò, Tamanjan kabara kosèbè, a ko :

- "èe, ne Sunkalo ka Tamanjan, Turamagan ka binyè kisènin kelen ka ne sògò, o këra kabako ye dè.. ne ye tama kë ka Turamagan sògò sògòma fè, tama ma se ka don. wula fè, ne ye tama kë ka Turamagan sògò, tama ma se ka don Turamagan wo lo la: Turamagan ye a ta kë ka ne bon, o ye ne don."

i komin Tamanjan, a fa Jolofin masa, o dògònin de ye Sunkalo ye, Tamanjan ko o la sa, k'ale Sunkalo ka Tamanjan.

ka maana

tuma na sa, jeliw ko :

tama këra ka Turamagan sògò sògòma fè,
tama ma nun kan bò.
tama këra ka Turamagan sògò wula fè,
tama ma nun kan bò.
Turamagan ka binyè kisè kelen ye Tamanjan sògò.

◦ ◦

Tamanjan siranna o de la sa, a m'a yèrè sègèn ka taa
yòrò si bilen. o maloya kosòn, a këra mògò fagonnèn ye
jamana kònò.

kabini a y'a mèn ko Turamagan taalen Manden, k'o
fariganna, a ko o ye ale nò ye. Turamagan fatulen sa,
a bë to k'a fò mògòw ye ko ale de y'a faga sira kan,
k'a sòrò, a ma kë ten. a këlen, ni Manden ye Jolofin
masakè ka jamana mara a yèrè ye tuma min na, mògòw
y'a dòn ko Tamanjan ta tè tinyè ye cogo si la, a ta bëe
këra nkalon ye.

hali i salen kò, i togò tè tunun

Turamagan Tarawele satò, a ye ladañili kan minnu fò,
ni Sunjata de y'olu fò a ye, olu filè nin ye :
a ko ale si o si, n'oko a bë sènèkèla lagosi, ka tila,
la tonyò, a ko ala k'o tigi malo joona.
a ko fana a si o si, n'i ye i ka jamana janfa, ala k'o
tigi fana malo. a ko mògò, i këra cogo o cogo la, i kana
faso jamana janfa.

◦ ◦

Turamagan fatulen, o san sabanan, Jata fatura. nka u
nyanaw jòra u nò na. Sunjata ye Turamagan Tarawele
nyana fara a taw kan. a gundo bë Manden hali bi,
mògò tè se ka Manden nyanaw kòròbò cogo si la hali bi.
o kò fè, Turamagan faso tun ye Bankumana ye. i komin
Bankumana ni Manden Kaaba man jan, u ka kow bëe ye
telen ye. i komin Turamagan këra cè nyuman ye ka Sun-
jata Keyita dèmè faso kunmabòli baara la, o de y'a to,
sera ko la.

ni mògòw sònna nyògòn ye, ala b'u dèmè. nka, n'aw
nyèna nyògòn ye, ala b'aw barika ban pewu. Turama-

gan ani Sunjata sònna nyògòn ye kosèbè, ala fana ye
barika don u la u ka bëni n'u ka tilennenya kosòn. u ma
malo dinyè kònò abada.

Sunjata ani Turamagan, u mògò fila bëe tun bë hinè
sènèkèlaw la. o de y'a to, ala y'u sutura u ka dinyènabò
kònò.

◦ ◦

ninnu bëe kò, Turamagan dògòw Kange Jan ani Musa
ani Dantuma, olu bëe sigira Bankumana Manden, Kaaba
kèrè fè. Bankumana mògò caman ye Tarawelew ye kabini
o waatiw la, fo ka na se sisani ma.

Tarawelew cayalen nyògòn kan Bankumana, fadènya
donna u ni nyògòn cè. o këlen, dòw wu'lila ka bò Ban-
kumana dugu kònò, ko u bë taa yòrò wèrè. olu minnu
wulila ka bò Bankumana kònò, olu de ye Denkè sigi, ka
Sirakèmèni sigi. o bëe këra dugu barikama ye sisani.

ni mògò min ye barika nyini, hali i salen kò, i togò tè
se ka tunun. i sibolow bëe bëe dò sòrò a la.

Gabukòrò Keyita yèrè ye Turamagan Tarawele ka maana in kuncè ni kan min ye, o filè :

"an balimaw, fòlò mògòw tun tè tubabukan dòn. nka, u tilé diyara, u hakili tun ka dì. anw sisani
mògòw hakili man dì, fo n'i y'a sèbèn. o kosòn, ni mògò min ma kalan kë, fèn tèna mara o tigi
kònò. o de y'a to, anw ma tubabukan kë, balikukan nalen, an y'an ji ja o fè, k'o dòn dòn.

o de y'a to, ne sera ka nin sèbèn.

ala ka kalan in taa nyè fè kosèbè, ala k'a yiriwa Mali cè ani Mali muso bëe fè. ala sago, aw sago!"

Gabukòrò Keyita, Soso.

nb'a fè ka nyèrè dòn

Mali jamana n'a denw

Mali ye jamana ye, min dugukolo dañen bë kilomètèrè kénè 1240192 kan (kare min kérè naani kelen kelen bë kilomètèrè kelen bò, o de ye kilomètèrè kénè ye. o bë bèn taari 100 de ma).

Mali dugukolo ni jamana minnu bë danfara, olu ye Senegali, Moritani, Alizeri, Nizéri, Kodiware, Hotiwalita, ani Lagine ye.

Mali ye jamana ye, min ni kògòji ka jan kosèbè. o kosón, magonyèfèn minnu tè se ka dilan jamana kònò, n'olu ka kan ka na ka bò kògòji kò fè, o caman bë na Senegali, walima Kodiware fè.

*
* *

Mali kònò mògòw jate minèna san 1976 desanburu kalo la. o jateminè y'a jira ko Maliden bëe lajèlen ye mògò 6394918 ye, cè 3123733, ani muso 3271185.


Maliden dòw sigilen bë duguw kònò, walima cikèbugu la. dòw bë ka taama taama tuma bëe u ka baganw nò fè, k'a sòrò sigi yòrò kelen tè olu la. o mògò nyögòn bë mògò 466422 bò Mali kònò.

jateminènaw y'a kòlòsi ko dò bë ka fara Malidenw kan san o san. u y'a jate minè ko san 1976 kelen kònò, mògò 158235 de farala an kan (mògò 114530 fatura, ka denmisèn 272765 wolo Mali kònò o san kelen na).

n'o nyögòn kèra san o san, n'i y'a jate minè, k'a ta san 1976 la, ka n'a bila nyinan na, i n'a dòn ko an bë bi bi min na, Maliden hakè ka kan ka bèn mògò 7400000 nyögòn ma.

o jateminè y'a jira ko baarakèla bë mògò 2193167 bò Mali kònò. olu la, cikèlaw de ka ca, olu bë mògò 1700000 nyögòn bò. bagangènnaw bë bèn mògò 200000 nyögòn ma.

fiyentòw fana jate minèna, ka bèn mògò 49041 ma.



bagi ni kuna bë minnu na, olu bë mògò 18331 bò. fatòw ye mògò 12152 ye.

*
* *

siya suguya minnu bë Mali kònò, olu ye bamananw, maninkaw, kasonkaw, marakaw, jalokaw, fulaw, surakaw, kòròbòròw, burudaamèw, kaadòw, bobow, sinèfow, minyan-kaw, bosow, ani siya caman wèrèw ye minnu sigi-sigilen bë a maraw kònò siyaba siyabaw kérè fè.

(a tò bë bò kibaru nataw kònò)

gde ethnies